

lis Gnovis

■ **TUMIEÇ.** I segrets dai orloiars

Cemût mai chei di Pesariis, di secui incà, fâsino orlois? Dulà àno imparât il mistîr? Par rispindi a chestis cuistions il Proget «La Valle del Tempo» al à inmaneât la convigne «Dalle invenzioni di Leonardo da Vinci ai tesori dell'orologeria europea». Joibe ai 26 di Setembar, si confrontaran a Tumieç esperts dai orloiars dal Jura, dal Tiròl e di Salzburg. Stefano Solari de Universitât di Padue al presentará la relazion: «Origine e tradizioni dell'arte orologiaia in Val Pesarina»; Denis Visintin di Porec/Parenzo al fevelará su «I Solari e i Capellari in Istria: testimonianze e nuove ricerche». Al presentará la convigne (a 10, li de viere Comunitât montane) Alceo Solari, responsabil científic dal Proget.

■ **UDIN.** Citâts pe aghe

Al è partît il proget dal Centri di volontariât internazionâl «CeVi» (www.cevi.coop) su la crisi climatiche e su la disponibilitât di aghe tes citâts «Le città e la gestione sostenibile dell'acqua e delle risorse naturali». Fintremâ tal mès di Dicembar dal 2000, si lavorarà par creâ rêts di citâts e di aministradòrs, di citadins e di comitatîs, di scuels e di zovins impegnâts a sielzi compuartaments corets e sostenibils. Cul «CeVi», a colaboraran «Cafco» e Universitât furlane, dongje altris clapis e istituzions di mieze Italie, comprendût il «Gruppo Missioni Africa» e il «Comitat talian pal Contrat mondiâl da l'aghe». Un dai 5 «workshop» cun dutis lis vilis de rêl al sarà proponût a Udin. Fra i obietifs dal proget, a jentrin chel di cjapâ dentri te rêl al mancun 30 citâts e chel di meti in zornade lis «Agende urbane di Sviluppo sostenibile delle Città» e la «Carta di Bologna per l'ambiente».

■ **PORDENON.** Aghis, rois e risultivis

Il circun «Fabiano Grizzo» di «Legambiente» e «Coop Alleanza 3.0» a àn inmaneât il concors fotografic «Acque, rogge e risorgive del Pordenonese» par tamesâ il stât dai ambients paludins e lis menacis cuintri des aghis te Basse concuardiese. Lis fotos ineditis (no plui di 5 par concorint) a varan di rivâ dentri dai 30 di Setembar a la direzion: pordenone@legambientefvg.it.

■ **GRADISCJE.** Ridadis imperiâls

E larà indevant insin ai 2 di Novembar la rassegne teatrâl «Risate a Gradisca», imbastide li de «Sale Bergamas» di Gradiscje Imperiâl de clape culturâl «Gradisca... il teatro». I apontaments a colin ducj di sabide, a 20.45. Ai 21 di Setembar, il circun «Don Eugenio Brandl» di Turiac al presentará «La zena de le insempiade»; ai 28, un «Cyrano de Bergerac... in salsa comica» al sarà proferit de clape culturâl «Ronzinante» di Merate (Lecco). Di Triest, ai 5 di Otubar, a rivaran i atòrs de compagnie «Ex allievi del Toti» par rapresentâ «Viva l'a... che numeri». Il «Trio Incerto» di Fabiano Fantini, di Claudio Moretti e di Elvio Scrucci al proponarà «Fieste», ai 12 di Otubar. I «Trigeminus», cun Mara e Bruno Bergamasco, a saran su la sene ai 19 di Otubar, cun «Pâr impussibil». Lis ultimis dôs seradis a colaran ai 26 di Otubar («Dove vai tutta nuda?»), par cure di «I Tre Pantaloni - La Buona Compagnia» di Padue; e ai 2 di Novembar («Sarà perché ti amo», par cure di «Terzo Teatro» di Gurize), pe uniche serade li dal «Teatro Nuovo».

Joibe 19	S. Zenâr	Lunis 23	S. Piu di Pietralcine
Vinars 20	Ss. Martars coreans	Martars 24	S. Pacific
Sabide 21	S. Matie apuestul	Miercus 25	S. Firmin
Domenie 22	S. Ignazi	Il timp	Primis plois autunâls



Il soreli
Ai 19 al iève aes 6.50 e al va a mont aes 19.12.

Il proverbi
Ben al ven di ben, mâl al ven di mâl.



La lune
Ai 22 Ultin cuart.

Lis voris dal mès
Si pues semenâ cicoriis, carotis, selino, fenoi, spinazis.

Nudriment pes Comunitâts

La curie dai Bens comuns e je vitâl par creâ partignince comunitarie

«Lis nestriz organizacions, ançe s'a operin in setòrs diferents, a considerin la curie dai Bens comuns l'element ch'al unifiche lis funzions di ognidune di lôr, al ven a stâi sussidiarietât, integrazion fra public e privât, rapuarts virtuôs fra citadins e istituzioni, creazion di partignince comunitarie e di sens civic, produzion di cognossince e valorizazion dai teritoris»: al dis cussî il quint pont dal «Manifest pai Bens comuns» che «Touring Club Italiano» e «Fondazione Cariplo», cun «Cai», «Caritas», «Fai», «Labsus», «Legambiente» e «Slow Food», a àn firmât, tal mès di Març stât, a Milan, par podê colaborâ dutune a pro dai «Bens comuns». L'impegn uficiâl, ch'al rivoche i articui 4, 9 e 118 de Costituzione e ch'al marche trop che «tignî cont dai Bens comuns al prodûs efets positifs tant su cui ch'al è impegnât te curie che su la societât», al è stât pandût biel ch'e lave indevant la racuelte di firmis pe propueste d'iniziativa populâr «Disegno legge delega Commissione Rodotà beni comuni, sociali e sovrani» (www.generazionifuture.org). Seont i promotòrs de mobilitazion, une vere culture de «condivision e de colaborazion fra istituzioni e citadins» si sviluparà dome quant che il sisteme juridic, dongje dai Bens publics e dai Bens privâts (ch'a son bielzà tratâts tal Codic civil), al ricognossarà ançe i Bens comuns. Te propueste di leç, a son definîts «Bens comuns» chei Bens «ch'a esprimin utilitâts funzionâls al esercizi dai dirits fundamentâi e al libar svilup de persone». Par chel, «a scuegnin jessi difindûts dal ordenament juridic, ançe a bon



Un moment de «Fieste dai Bens comuns di Muçane» dal 2016

Par dut il mès di Setembar, si pues ancjemò firmâ la propueste di leç de «Comission Rodotà»

pro des etis avignî» e il lôr «ûs coletif al à di jessi garantît in ogni câs, seont i limits e lis formis stabilidîs de leç». Ma par che la propueste di modifiche dal Codic civil e rivi in Parlament al vûl ch'e sedi firmade di al mancun 50 mil eletòrs. In zornade di vuê – al declare Gian Luca De Vido, ch'al à coordinât la racuelte in Friûl, in dite dal «Forum dai Bens comuns e da l'Economie solidarie» (www.forumbenicomunifvg.org) – lis vilis dulà che la mobilitazion e je stade plui vivarose a son Montreâl, Pordenon e San Vit dal Tiliment, tal Friûl occidentâl; For Disot, Morteon, Puçui, Tavagnà, Trep Grant, Tumieç e Udin, tal Friûl centrâl. La racuelte li dai Municipis e je finide tal mès di Avost, ma il Comitât organizadôr al à decidût di srolungjâ la pussibilitât di tirâ sù firmis intant des manifestazions publichis, par dut il mès di Setembar. «Te provincie di Udin, o

vin metût sù dai Comitâts teritoriâi, coordinâts dal «Forum per i beni comuni» – e sclaris Elena Mariuz, volontarie dal Comitât di Udin in dite dal «CeVi» –. In grazie lôr, a funzionaran bancuts publics cui autentificatòrs necessaris». A Udin, si podarà poiâ l'iniziativa in place San Jacum, vinars ai 20 e ai 27 di Setembar (17-19), e sabide ai 21 di Setembar, li dal marcjât di Vât (10.30-12.30). Ançe la librarie «Friuli» di strade dei Rizzani e ufrissarà il servizi, ogni lunis (9.30-12.30). A Çuian di Puçui, il bancut al funzionarà joibe ai 26 di Setembar, prin e dopo la relazion serâl de convigne dal Centri «Balducci». Domenie ai 22 di Setembar, la racuelte e sarà inmaneade a Tumieç, intant de fieste dai miluçs, te place 20 Settembre (10-13). Su la pagine Facebook «Forum Beni comuni», si podarà cognossi altris pais cun altris oraris garantîts

Mario Zili

Peraulis in dismentie par cure di Mario Martinis

❖ **DISLIDI**

v. = soffriggere, rosolare
(verbo formato dal prefisso dis- e da lidî "sciogliere, friggere")
Prin dislît la cjar intune padiele cjalde, dopo metile sul fûc.
Prima rosola la carne in una padella calda, dopo mettila sul fuoco.

❖ **DISLUDÂT**

agg. = immemore, che si è dimenticato, smemorato
(dal verbo disludâ "dimenticare")
Purtrop o tachi a sei un tic disludât, tu âs di puartâ pazienze.
Purtroppo comincio ad essere un po' smemorato, devi portare pazienza.

❖ **DISMENTIE**

loc. avv. = nell'oblio, nel dimenticatoio
(forma deverbale di dismentî "dimenticare")
La mē domande ise lade in dismentie?
La mia domanda è andata nel dimenticatoio?

❖ **DISORE**

avv. prep. e s.m. = di sopra; al di sopra, sopra; la parte superiore
(dal latino de supra "di sopra")
Disore tu cjatarâs dut come che tu lu âs lassât.
Di sopra troverai tutto come lo hai lasciato.

❖ **DISOT**

avv. prep. e s.m. = di sotto; al di sotto; la parte inferiore
(dal latino de subto "di sotto")
Disot, dopo i savòrs, o cjatais lis plantutis de salate.
Di sotto, dopo il rpezzemolo, trovate le piantine dell'insalata.

❖ **DISPÈS**

avv. = spesso
(formato da di- e spès "spesso", letteralmente traducibile come "di spesso")
Passe plui dispès a cjatâmi.
Passa più spesso a trovarmi.